

四庫全書

集部

欽定四庫全書

集部

小山類稿卷五

詳校官中書臣葉元符

中書臣劉源溥覆勘

總校官知縣臣繆琪

校對官中書臣劉源溥

騰錄監生臣陳箴

欽定四庫全書

小山類稿卷四

明 張岳 撰

奏議四

總督湖廣川貴稿

至湖廣謝恩疏

欽差總督湖廣川貴軍務都察院右都御史臣張岳謹
奏為謝恩事臣於嘉靖二十七年九月內自兩廣交代回

至原籍福建泉州府地方據原差舍人葛智齋到通報
兵部一本為捷音事節該欽奉聖旨張岳陞都察院右
都御史賞銀五十兩紵絲四表裏欽此續准吏部咨為
叅論地方失事官員事奉聖旨張岳著以原職總督湖
廣川貴軍務寫勅與他著上緊去欽此又准兵部將總
督職任事宜題奉欽依備咨到臣遵奉明旨當即起
程十一月二十八日至江西安仁縣地方接領欽降關
防十二月二十日又於湖廣省城祇接勅書符驗令旗

令牌欽遵行事外但臣原由兵部左侍郎陞授前職係
在京堂上二品官例該具奏辭免復有前項總督重務
干係三省地方廣濶夷情變詐事體未嘗歸一兵糧等
事所宜亟處若再循例辭免待命下而後供職往復稽
遲恐至誤事臣所以聞命馳驅不敢復辭竊念湖貴二
省苗夷作惡多年議征議撫迄無成功必欲征則必勝撫
則可久非得老成練達暢曉兵機之臣不足以副此重
託如臣疎庸豈所勝任臣於聞命之初即將湖貴二省

兵馬錢糧夷情等項馬上差人齎文該三司官查報近據各報稱湖廣麻陽等處苗蠻頗出投官聽招貴州雖聽招撫而實陽順陰逆終難馴服臣切以各賊積惡多年固當殄滅然中間亦有旁相煽動非出本心今既聽招又無加兵之理況且臘盡春回雨水時作農務方興動兵深剽亦非其時臣遵奉勅諭事理將各投官聽招者開示恩信使之安心向化無復疑慮其強梗負固不肯降服及名雖降服而陽順陰逆仍前越境為惡者再

行撫處必其執迷已深難再姑息方行會兵剿殺蓋聽
撫既衆賊勢自孤征或可勝撫必可久臣踈庸愧非軍
旅之材仰荷聖明簡付重託不自揣度冒昧受命夙夜
黽勉誓竭心力期於恩威兩播民夷俱安上紓聖明南
顧之懷下解二省積久之患至於天高地厚之恩又豈
此犬馬微力所能報稱臣下情無任激切感恩圖報之
至為此具本專差百戶陳經綸齎捧稱謝謹具奏聞

領總督勅書題知疏

題為總督軍務事嘉靖二十七年十二月二十日欽奉勅諭總督湖廣川貴軍務都察院右都御史張岳近該貴州撫按官奏稱貴州地方惡苗據險大肆猖獗擬調近省官兵進剿但權無統攝未免動分彼此乞要添設總督大臣居中調度庶得事體歸一事下該部議謂宜如所請今特命爾前去總督湖廣川貴軍務在於沅州駐劄爾宜查照該部題准事理計畫一應兵糧隨宜酌處若苗人稔惡弗悛爾即調督各省官軍大加征剿務要

同心協力以靖地方事體重大者奏來定奪撫鎮以下
官員悉聽節制俱得照例舉劾指揮以下不用命者以
軍法從事流官給由并土官襲替俱要呈詳覈允然後
起送其廣西右江道雲南安普道各守巡官及各宣慰
宣撫長官鄰界州司聽爾一體節制其或苗人革心聽
順亦宜善加撫輯以圖久安爾為大臣受茲委任須相
度機宜計處停當毋玩寇毋擾民務使威懾恩流遠人
畏懼地方寧謐斯稱任使毋得處置乖方致貽重患爾

其敬之慎之故勅欽此欽遵臣當即望闕叩頭謝恩及
一面前至沅州地方駐劄行事及通行湖廣川貴三省
都布按三司并廣西右江道雲南安普道守巡官并各
宣慰宣撫等官各一體欽遵外今將奉領過勅諭理合
具本順差百戶陳經綸親齎謹具題知

謝陞職賜金幣疏

奏為謝恩事臣於嘉靖二十七年七月初八日伏蒙聖
恩以臣前任兵部左侍郎提督兩廣軍務征剿賀連地

方効有微勞欽陞都察院右都御史賞銀五十兩紵絲
四表裏本年十二月二十日據公差承差曹東周齋到
前項欽賞紵絲於湖廣武昌府地方臣當即望闕叩頭
祇領訖伏念臣草茅下士章句諸生愧無折衝禦侮之
材謬當典戎幹方之任五嶺之恫瘼切身三軍之耳目
在將不遑夙夜若涉深淵雖有微勞皆遵廟略然猶險
阻未夷征戍不息計過論功免責為幸茲蓋伏遇皇帝
陛下德同天地明並日月覆載無私於遐邇照臨必及

於幽微功疑從重賞必為勸既陟階班兼賚鏹幣旋授
鉞於閩外俾董師於黔中煌煌錫命至自九霄穆穆清
光不違咫尺江湖萬里狗馬寸心敢謂去天之遠積懷
戀主之誠謹當丕揚威靈輯和卒乘思皇度之如金以
形民力施五采以作服豈但身章永肩砥礪之心庶免
鷄梁之刺臣下情無任感戴天恩激切懼忭之至為此
具本專差百戶李泉親齎稱謝以聞

論湖貴苗情并征剿事宜疏

題為苗情緊急乞用兵征剿以靖地方事嘉靖二十八年四月二十日據貴州布政司分守新鎮思仁二道兼管撫苗右叅議楊儒呈報龍塘新寨盤黨地所麥地小茶園等寨節經奏內有名賊首龍許保吳黑苗龍老革吳老毛龍倭龍柳那龍老課龍角馬等自本年正月起至四月初八日止或一十二成羣或糾至四五十徒潛伏林菁伺人不意出沒劫掠黃蠟灘架規迷路屯等處地方虜去客商船米軍民財物男婦頭畜非止一次

將人口歸寨勒要老銀取贖本月二十八日續據右叅議楊儒呈報平茶長官司土官楊和原招鬼提寨苗賊龍老課龍董等五十名為兵近日縱回糾同蠟爾山逃苗龍角馬等夥約五百餘徒打劫萬山架規豬樓山迷路窳帕等處虜去男婦牛馬各計不等回寨本年五月初七日又據右叅議楊儒呈報四月二十五日寅時被龍塘鬼提等寨叛苗龍許保龍角馬等數百餘徒攻劫省溪園殺人宰牛屯住至次日寅時方去本園老幼男

婦牛馬財物盡被剗訖時有土舍楊再仕倡率苗民追敵衝脫男婦百餘名口仍向前追趕未回及稱省溪旣破則銅仁思州印江等處亦必被害等因到臣臣節行彼處巡撫總兵及兵備等官添兵防守截捕及行撫苗官再行撫處并將各失事官員查究治罪干礙奏請者查明另叅外為照各賊恃險負固頻年猖獗流毒三省邊方累經奏請征剿未能得獲旋撫旋叛乘利出沒臣欽奉勅諭近該貴州撫按官奏稱貴州地方惡苗據險

大肆猖獗擬調近省官兵進剿但權無統攝未免動分彼此乞要添設總督大臣居中調度庶得事體歸一事下該部議謂宜如所請今特命爾前去總督湖廣川貴軍務在於沅州駐劄爾宜查照該部題准事理計畫一應兵糧隨宜酌處若苗人稔惡弗悛爾即調督各省官軍大加征剿務要同心協力以靖地方事體重大者奏來定奪撫鎮以下官員悉聽節制俱得照例舉劾指揮以下不用命者以軍法從事欽此欽遵臣初到地方以

苗亦人類未忍用兵布信曉諭冀其悔悟各苗初頗畏懼不出纔一兩月復肆行刦初間只是一二十名或四五十名所虜人口尚未敢殺害勒求取贖追捕稍急輒稱願撫近則敢於聚衆至千百人徑入村落攻刦司治放火殺人撫諭非不諄切各賊姦猾反因招撫之意以逞其兇又探知該省兵力素弱錢糧艱缺倉卒出沒力不能制公肆欺侮以示無忌防守之兵數至五千餘名月支行糧費用不貲聚之則地方廣闊照管不周分散

則勢分力弱常被衝壞又兼湖苗雖已聽撫夷情多變不無觀望之心若貴苗就誅則湖苗之撫可固苟姑息貴苗則湖苗無所畏憚久必相效為非利害較然臣晝夜反覆思維若非會兵剿殺傾其巢穴剪其醜類則地方不得寧息臣謹遵照勅諭事理預行三省整搦人馬會計糧餉選委將領及行貴州巡撫總兵官將賊巢險易道路遠近賊徒多寡哨道分合備細畫圖貼說以憑會行分派軍馬剋期進剿另具題奏外照得舊時各省

會兵以一省為主事體不一嫌怨易生又軍需錢糧往往責望地主不能及時應付互相責望所以鮮有成功伏惟聖明洞見此弊總督之任猥及微臣無非欲奉揚天威申明灋令使事體歸一人情協同除積年根深之禍為永遠安寧之計臣又思方今苗患貴州最急湖川二省未及切身恐利害緩急既殊人情不無向背萬一臨時各守所見進退從違微有彼此則為上辜嚴命下攜羣情其弊又將使議論相持歲月玩愒師老財匱如

向日之誤事而後已此臣所為大懼也謹將欽奉勅諭
同心協力會兵剿殺一應兵糧隨宜酌處事理備列條
件干瀆天聽乞勅該部叅酌若於事理無礙轉行與臣
通行三省大小衙門官員并各土官遵照庶凜一令信
人知趨事而賊可平緣係苗情緊急用兵征剿事理
未敢擅便為此具本專差千戶翁思誠親齎謹題請旨

計開

一舊規各處用兵以副叅遊擊都司等官一員領

哨布按二司官一員監之布政司官一員專督
軍前糧餉俱推選平日素有才望諳曉夷情地
利者其分領小哨分管糧餉等項府衛以下官
俱布按二司掌印官會推詳定聽用今三省會
兵地方廣遠除貴州外湖川二省合無於附近
貴州道分推委該道缺人方委別道其領兵官
先儘該省如該省缺人即推委鄰省務要熟知
夷情地利者軍前糧餉軍需器械之類該省各

支錢糧隨軍措辦自供其軍俱限八月終齊備
湖廣於辰州府四川於彭水縣貴州於鎮遠等
處等候尅期若故意延緩失誤軍機聽臣叅究
處治則事預易立不致臨期倉忙矣

一查得貴州布政司只有銀三萬兩堪以動支糧
米甚缺除臣從宜計處外及照舊規湖川二省
每年協濟貴州糧銀各三萬兩歲歲運解尚有
拖欠但此乃每年坐派歲用之數只勾一年支

給若移以供軍歲用必缺貴州愈見艱難今三省會兵軍前錢糧通融出辦湖川二省合無行令查支倉庫相應錢糧隨軍供給其前協濟貴州銀兩仍照歲例運解不許扣作今次軍餉以致貴州歲用不敷日後取予各執一端紛紛論辯有虧事體

一湖貴節年用兵俱調土兵各該土官挾賊為利邀索無厭曲意從之愈加放肆且如軍兵行糧

每月例只四斗五升兩廣土兵只支三斗惟湖廣土兵於四斗五升之外又多索一倍每斗折銀五分該銀二錢五分若兵一萬每月該銀二千五百兩湖廣上年調土兵三萬六千名每月該銀九千兩自進山至散兵共十五箇月共該一十三萬五千兩是於行糧每名四斗五升之外又無故多費此一十三萬五千兩以與土官也湖廣如此推之川貴可知土官高坐營中計

日得銀只願賊在豈肯滅賊臣到地方即追究
其所以冒破錢糧縱賊不殺之故示以國法亦
頗悚懼合無今後行糧照例只與四斗五升其
加取一倍者通行革去候獲功日以為賞賚之
資功多從厚則土官利在殺賊不敢不用命矣
一節年調土兵以剿賊而土官即私募苗賊以充
兵數所支行糧分給各賊且如賊首龍老課原
係奏內有名惡賊上年平茶長官司楊和招其

黨五十名以為兵以龍老課而征龍老課欺弊至此近聞臣至乃縱回又夥合別賊為惡若復調兵則又招去抵數如此賊豈有可盡之期土官之中亦有素修行止者如永順宣慰彭明輔之類其餘多頑悞無能其狡猾者不過一二人若楊和其最也合無容臣將善者量行獎勸若平時跋扈有名通賊貽患舉其尤甚者處治一二則土官知畏令行於土官而賊不平者未之

有也

一會兵之要所據者哨道所信者剋期哨道既分約會有期若一哨愆期不至則全軍為之撓敗今三省之兵各從其邊界入哨剋期於千里之外欲如期而至其責全在領軍與監軍等官合無指揮以下違期者聽臣遵照勅諭事理以軍法處治三司等官三日不至行令聽叅依律問罪別委官代之使逗遛之弊革而軍政可肅也

一節年各處用兵紀驗功次多係巡按御史帶管
今兵端雖為貴州而動三省會合各効其功若
只行一省巡按紀功存削之際稍有輕重必致
煩言合無各省所獲功次除報臣軍門給賞外
一面類報該省撫按官巡按御史駐劄於附近
去處紀驗功次稽察軍前奸弊事完將功次各
自覈實奏報其軍前費用過錢糧管糧者亦造
報該省撫按官委官查刷庶奸弊無所容而人

知警言矣

乞辭免疊賞疏

奏為乞恩辭免重賞事准兵部咨該本部題為剿除地方劇賊事該巡按廣東監察御史黃如桂將臣原任提督兩廣軍務征剿廣州府連山縣地方劇賊斬獲功次覈實奏報本部覆題奉聖旨這功次既查明白張岳陳圭各賞銀四十兩紵絲二表裏欽此欽遵備咨到臣照得臣先於嘉靖二十七年正月內為賀縣連山兩省交

界盜賊往來流劫積有多年民受其害遵照原欽奉勅
調事理督調漢土軍兵會合夾攻將斬獲功次緣由於
本年四月二十日具本奏報該兵部覆題奉聖旨賊寇
盤據稱亂流毒地方征剿既平撫鎮官有功可嘉張岳
陞都察院右都御史陳圭廕一子與做錦衣衛百戶還
各賞銀五十兩紵絲四表裏欽此欽遵臣於本年十二
月二十日行至湖廣武昌府地方祇領欽賞當即望闕
叩頭謝恩具本差百戶陳經綸齎赴奏謝外臣切惟賀

縣連山地方雖有彼此之分而調兵夾攻實同一事臣
於事完奏報捷音連山已在其中欽蒙聖恩陞賞優厚
臣自揣微勞不足以稱鴻恩方此懷愧豈敢此外更
有希望今又蒙重疊加賜雖賞疑從予固聖主獎善之
權而度功而受亦微臣奉職之義所有前項賞賜委係
重疊臣私義實有未安所當控辭伏望聖恩收回成命
將前賜臣銀兩紵絲停止俾臣得安愚分免於冒昧之
譏臣不勝受恩感戴之至為此具本專差承差董忻親

齋謹具奏聞伏候勅旨

極陳地方苗患并論征剿撫守利害疏

題為地方苗情事嘉靖二十八年二月十五日據貴州布政司分守新鎮思仁撫苗右叅議楊儒前到軍門稟稱各苗賊今年正月以來雖不大肆劫掠時常有十數為羣在於道路邀截行旅不絕該臣看得各賊因去年用兵耕獲失時今春乏食窮逼搶奪勢所必至就經行令該地方多方防備隨據湖廣守巡湖北道撫苗右叅

政王崇兵備副使陶欽夔呈稱鎮算二司所管下苗寨
諸苗俱如原撫市場耕種無異又該臣議照貴苗為惡
本所當誅但中間善惡順逆亦有不同若不分別一槩
誅殺恐及無辜開條告示刊發二省苗寨諭令已聽撫
者照舊安插未聽撫者許其改過自新一般撫納仍行
各地方官嚴加防守去後訪得銅仁府地方黃蠟灘被
苗刦虜市客米船又有一夥苗賊由田埂坪等處截路
拏人往來驚懼道路多警及據銅仁差來義官席淮口

報相同顯是各賊陽順陰逆乘隙出劫各該地方防守
欠嚴以致出沒又不即行飛報坐視貽患切責湖貴二
省衙門嚴加把截一面行查出劫苗賊要見是何寨分
某苗是何流土官管下緣何復行作叛會查明白呈報
區處本年四月二十日方據撫苗右叅議楊儒回呈各
賊糾衆出劫次數本年五月初七日又據撫苗右叅議
楊儒分巡僉事范愛各呈為十分緊急苗情事內開惡
苗龍許保等千餘攻省溪司衙門劫印殺虜等情本月

二十九日又據叅議楊儒呈報苗賊龍許保寫帖一張
挾要銀兩贖印并贖取人口又要官司供送糧草本年
六月初七日又據僉事范愛呈稱首惡吳黑苗龍許保
等糾拽各寨并湖廣蠟爾冷水逃苗及四川酉陽管下
小平茶地龍菁地崩岑等寨惡苗四百有餘聲言要打
茅坡龍教思州府并印江縣朗溪長官司一帶地方吳
黑苗守截糧船就打施溪長官司一帶又據叅議楊儒
呈稱叛苗龍角者等各出劫緣由到臣該臣分投差官

督調酉平二司原防守逃回土兵各一千名又督調湖廣永保二宣慰司土兵各二千五百名又督調貴州獨山州土兵五百名俱往銅仁及黃蠟灘地架等處與原撥軍兵相兼防守外照得貴州數年以來財力困竭盜賊縱橫人情畏怯上下相蒙以賊為諱其初出劫勢不甚大則以為常事而不必報至殺虜已多勢不可揜則預憂叅究而不敢盡報及賊滿其所欲係累載道時有漏脫尾獲而歸則以截殺奪回聳報地方積弊其來已

久臣入境之初據各衙門呈報文書皆以盜賊斂戢地方無事為言惟雲貴各處公差人員經臣衙門往往稟求護送再四采訪乃知前賊原未戢斂不但銅平一處為然處處聞風肆出雲貴官道幾不敢行事勢已極理宜處置已將招徠緣由及用兵條款開具奏請仍行該省守巡撫苗等官查勘節次剗掠事情據各陸續稟報前來中間尚有匿而不報報而不實及去年攻打省溪長官司衙門衝陷營堡虜去指揮張

韶等已經叅奏追取未肯釋放法度日弛民生可哀任事之臣豈能無責叅照鎮守貴州總兵官白法分守撫苗右叅議楊儒分巡僉事范愛守備以都指揮體統行事胡寧俱有地方之責難逃玩寇之罪相應處治以警偷惰但念其兵糧困乏力有所制況目下添兵稍多糧運不乏地方防備急在用人其白法楊儒范愛係原奉欽依帶罪殺賊人數其守備指揮胡寧庸陋貪汙見以賊敗雖非失事亦該罷黜如蒙乞勅該部再議將白法

等量加罰治仍令戴罪殺賊胡寧亟行黜革員缺推補
庶軍政少申偷惰知警臣又照得前賊驕恣不容不征
臣前次所奏大略已具但恐議者猶以山菁深險賊勢
勁悍難於收功為疑其稱為制馭良策者不過曰撫曰
守及割地以與土官使自為守三策而已此皆似是而
實未中事機何也嘉靖二十四年春賊勢猖獗左布政
使石簡親詣銅仁招撫既給以魚鹽又犒以花紅牛酒
又以防守地方為名計口而給之糧巨魁龍許保給以

冠帶又選幼苗一名充生員賊所需索無不應付如奉
驕子懼失其意可謂委曲之極而糧纔入手復出劫虜
未及一年勢愈驕蹇至於今日動言得糧而後聽招此
以姑息為撫無益而反釀患之明驗也嘉靖二十七年
擿兵之後調漢土軍兵五千五百九十名以守銅仁府
城又調酉陽宣撫司土兵一千名防守地名小橋平茶
長官司土兵一千名防守地名毛口皆賊出沒要路又
招凱里司土兵等龍必昇兵一千名住耕防守地架地

方皆賊出入要路甫經一月小橋毛口孤陷賊巢道路
險遠糧運不給土兵擅自掣散龍必昇兵亦為賊所衝
潰歸府城府城軍兵日久乏食逃亡數多昇龍必昇兵
僅存四千五百四十員名夫兵多則苦於乏糧兵少又
不足分布控扼賊路則賊所必攻聚於府城則緩急難
應此以支吾為守無益而徒耗費之明驗也至於給地
土官使自為守之說為不可者蓋湖貴苗蠻與兩廣猺
撞不同兩廣如古田府江羅旁諸賊皆散漫無統故或

欲立土官以管攝之臣往提督兩廣親詢各土官無敢
應承者以其難也若夫湖廣諸苗見有該管土官寨落
分明當其糾合為惡若不知有該管土官及或勢窮就
招非用該管土官招之不信蓋其相攝服數百十年雖
禽獸暴戾其本原之念亦有不盡泯者若舍其舊管而
使之服屬他人非惟各苗未肯甘心亦恐原管土官
陰相煽動激成禍變今鎮算就撫諸苗已服其土官管
束惟貴州銅平尚爾驕恣計二司之苗名數不多若分

兵深入傾其巢穴誅其魁渠其餘黨必震慄願招迨其
求招然後分遣原管土官就往撫之使之樹恩其土民
原不從賊而為賊所攻流散他處俱招回復業蠲逋負
省苛征使依土官居住以厚其勢循習既久則諸苗皆
可化為良也顧處之何如爾故臣愚見以為決須用兵
征剿然後撫可定守可固分背經理方得就緒故敢拳
拳以用兵為言若畏避勞煩隨衆苟安給食以撫添兵
以守豈無歲月之安終非長久之計於臣私計便矣其

金史卷之七十三
卷四
如地方生靈何哉臣所不敢而亦有所不忍也伏惟皇
上神謨雄斷燭見萬里乞勅該部查臣先今奏詞覆議
上請特賜允行三省地方不勝幸甚緣係云

謝賜銀幣疏

奏為恭謝天恩事本年八月十六日據臣原差齋本承差董忻齋
到通報一帙內開六月十八日該臣一本為乞恩辭免
重賞事奉聖旨已賞了不准辭該部知道欽此欽遵隨
據兩廣聽用千戶陳經綸捧到欽賞銀四十兩紵絲三

表裏臣當卽望闕叩頭謝恩祇領訖臣夙荷寵靈屢膺藩寄歲月荏苒功實未加叨御府之珍藏迨茲三錫瞻天顏於咫尺惟切中兢伏惟皇上恩浹宇內念軫邊方事有備而無患勞雖微而必錄恩波所及嶺海廻日月之光仁聞中孚湖湘見豚魚之感矧茲夷醜敢負生成臣志切馳驅義無還顧縱擒如策愧攻心之未能威信兼施庶執信之可不勝受恩感激之至為此具本端差指揮王官親齎稱謝謹具奏聞

奉勅切責謝恩疏

奏為謝恩事嘉靖二十九年四月初七日辰時准兵部
差百戶尚旻齎捧勅總督湖廣川貴軍務都察院右都御
史張岳近該巡按貴州御史張雨題稱印江縣治被惡
苗龍許保等攻陷將知縣徐文伯等虜去殘害生靈震
驚遠邇爾受專命調兵征剿日久不見平定今却愈肆
猖獗顯是爾等不能協謀制變所致據法本當重治但
念緊急用人之際姑從寬降勅切責著令戴罪管事爾

宜遵照前旨作速督率官兵相機征剿務要刻期平靖
以安地方如或仍前怠忽致誤軍事必罪不宥故勅欽
此欽遵臣當即望闕叩頭謝恩開讀祇領外照得貴州銅
平苗寇為惡多年臣恭受明命督師徂征愧無折衝禦
侮之材又牽於招安防守之議謀乖而事不集日久而
賊愈肆至於攻劫郡邑執辱官吏生民受其荼毒地方
為之恐動皆臣措處無策節制欠嚴所致當伏重罪
死無所辭伏蒙聖恩寬大貸其餘生俾圖後效特賜

勅書戒諭深切責以協謀制變刻期平靖皆洞見前此異同因循之弊俾各洗心一意趨事赴功蓋湟中屯田之策初亦譁於衆口元和伐蔡之役功竟成於獨斷矧茲殘寇又非昔比曰撫曰守持議累年語及征剿以難為解更有難者將若之何臣雖駕鈍實切羞之謹當遵奉勅書督率將士今大火過中秋氣將臨乘時進兵分哨深入三面夾攻若此賊不平臣有何面目可復奉勅書以對將吏拳拳愚忠必滅此賊以盡報答而後已伏

望聖明俯賜矜察臣不勝受恩感激憤發之至

保留叅將石邦憲疏

題為乞恩保留謀勇將官保全危急孤城事臣於嘉靖二十四年四月十九日准兵部咨為走報十分緊急苗情事照得添設分守湖貴鎮筩銅仁等處地方右叅將署都指揮僉事石邦憲近該巡按貴州監察御史張雨叅劾本部覆題節奉聖旨李夢祥林斌楊儒石邦憲都著巡按御史提了問員缺該部即行推補欽此欽遵所

有前項員缺從公推舉得署都指揮僉事樊世諒李英俱各相應題奉聖旨是有點的依擬用欽此欽遵內樊世諒有點備咨到臣欽遵臣看得叅將乃要緊將領正值苗情猖獗不可一日有缺備行石邦憲暫在銅仁防備不許擅離一面行文催促樊世諒赴任隨據銅仁府申據鄉官監生生員封縉陳時謨等六十四員名呈為前事切緣本府地方節被鎮筸銅仁惡苗利害禍極慘酷雖經各官屢年征剿或因偏執已見而智謀不協或

因畏難推託而姑息同風遇有事變却乃多方彌縫以致釀成大患本府孤懸虎口不絕如綫近於上年十月內石叅將到任以來駐劄本府本官痛切事勢大壞民害日深隨即申明號令晝夜綜理不避艱險親臨一切緊要關隘撥兵防守沿城壕塹淤淺去處監督兵夫挑澆重夾響籬安籤布荆下弔設窰自捐廩糧銀兩鼎立望樓四座修葺損壞串塚中築子城以使用武又於南岸漁梁頭衆思塘黃蠟等處築堡開濠劄營防禦且

見在哨兵寡呈請召募打手鄉兵日加操練鼓舞關志
親統發哨各處要路分兵伏捕如各苗攻剗邑梅石阡
等處本官身先士卒前去過截敵殺陸續擒斬有名苗
賊龍角者龍打岩等三十餘名顛又攻破罵勞苗寨奪
回被虜男婦四十餘名口蓋自二十三年之後我兵不敢
加兵於賊是以猖獗無忌至今始一挫之苗賊聞風畏
威盡行潛避菁谷不敢出沒本府孤城暫爾苟安皆由
本官保障之功近蒙明旨以印江失事逮及本官去任

士民間之莫不相向垂淚本官在銅仁一日地方則有
一日之安去銅仁一時地方即有旋踵之禍今有本官
保全銅仁尚以印江之事坐累若無本官將來不惟失
一銅仁其流禍肆毒尤有不可勝言者縱有新任官員
急難措處伏為俯察下情憫念本府地方連年受害乞
轉達天恩保留本官姑容戴罪仍以原職駐鎮本府殺
賊候大征事完之日方行聽理庶使事機易於就緒地
方早安等情及據銅仁長官司十洞土著殘民楊稠楊

文學等訴為懇乞奏留謀勇將官剷除惡苗以靖地方以安生靈事該府據前呈訴議照鎮筸銅平苗賊歷年積惡流劫地方蓋因將領非人苟延歲月虛費錢糧以致猾賊愈加兇狠自叅將石邦憲到任以來因見地方大壞極敝殘民荼毒倒懸竭力盡心改絃易轍號令整嚴賞罰明信內則修理城垣外則防守隘路各苗知畏潛避深山間或出劫即行截撲數月以來屢獲戰功城中暫獲稍安流民相繼復業且熟知地理諳曉夷情身

先士卒不避艱險年力精壯才識明敏似此將官誠不
多見前者印江失守委的罪責難辭但數千之兵俱經
本官多方調停漸有紀律傳聞諸苗頗有懼心今各寨
正缺食用正宜進取之時少添兵糧成功可必本官一
去各兵失主自難鈴制後雖有繼之者終不如其相信
之深驅使之易也况孤城切近賊巢賊之垂涎已非一
日近賴本官方得保全本官朝離銅城夕陷軍散于前
賊乘于後理勢必至其受禍不特印江石阡而已剥床

及膚深為可憂合無軫念危城殘民受禍至深功在垂成事成就緒乞行本官照舊用心綜理以俟大舉以收全功不得以去留變志姑待事寧聽候領罪等因開申到臣續又節據龍里鎮遠等八衛所戍守銅仁旗軍戴云八劉興九涂佑等告為懇乞存留能幹官員以平惡苗以恤戍苦事銅仁長官司申為懇乞奏留謀勇將官剿除惡苗以靖地方以安生靈事省溪長官司申為保留賢能將官彌迫禍以甦倒懸事委官普安衛經歷黃

國聲呈為乞恩保留智勇將官以安地方事烏羅長官
司申為乞恩姑留鎮守重臣以剿判苗以安邊境事提
溪長官司申為乞賜保留將官鎮守地方以安生靈事
據各申訴俱要存留本官鎮守地方候大舉事畢聽其
領罪等情到臣及據舊任叅將石邦憲呈該臣前行本
官仍在銅仁駐鎮候新任叅將樊世鯨到任方許離任
非敢不遵但念奉提誠恐苗賊出沒人心懈怠罔聽進
止難於約束合無委官前來管理容令卑職回衛聽候

提問臣因樊世鯨久候不見赴任即今秋期大舉急在用人只得行令本官仍在銅仁暫候一面督兵防守屢據本官呈報擒斬功次及生擒龍許保親弟龍光照等俱行該道紀錄案候另行外臣查得分守鎮筵地方叅將先該勘處夷情都御史萬鍾奏設原擬責任於麻陽駐劄在湖廣則常德辰州沅州九谿永定施州六衛永順保靖二宣慰司施南散毛忠建容美等宣撫司算子坪五寨等長官司及鎮筵九永二守備屬焉在貴州銅

仁平頭省溪烏羅思州施溪黃道溪等長官司及銅仁
守備屬焉其切近貴州地界如四川酉陽宣撫司平茶
邑梅等長官司亦皆屬其節制為照叅將石邦憲近因
貴州思南府印江石阡失事兩次城池兵馬非其統屬
責任而賊出不能遏截以致出巢刼掠罪果難辭應該
欽奉明旨回衛聽候提問原銅仁一帶地方苗賊出沒
緊關重地本官隄守已有次第值今正在大舉之期新
任叅將樊世鯨未到豈可輕縱本官擅離不無有悞事

機及照銅仁頻遭苗患軍民逃散十分狼狽商旅絕跡
糧運不通自本官到任以來修舉廢墜召集逃亡內築
子城外設濠塹鼓舞士卒搃巢截殺擒斬多功俘獲亦
衆商旅始集糧運得通地方賴以保障一聞去任屢有
申訴臣叨任督兵急在將材取其所長既有見聞不敢
緘默如蒙皇上軫念地方苗情緊急用人之際乞勅兵
部再加酌議俯順士民之情將叅將石邦憲姑留戴罪
專在銅仁地方駐劄殺賊贖罪事畢仍行提問具奏定

奪其新任叅將樊世鯨查照原議只在麻陽駐劄提調
湖廣一帶事後應否去留通行議處緣係乞恩保留謀
勇將官保全危急孤城事理未敢擅便為此具本專差
承差楊勝春親齎謹題請旨

小山類稿卷四

欽定四庫全書

小山類稿卷五

明 張岳 撰

奏議五

總督湖廣川貴稿

乞立存活被虜人口賞格疏

題為援例乞恩救活被苗虜執人口以廣德意事臣到湖廣地方節據貴州布按二司守巡新鎮思仁二道撫

苗兵備叅議等官楊儒等呈報各苗寨節經奏內有名賊首龍許保吳黑苗等潛伏林菁伺人不意出沒劫掠軍民財畜殺人放火虜去男婦非止一次等因到臣又據該道呈稱人口歸寨勒要老銀取贖及將虜去男婦割髮賣與各該土官去訖臣訪得苗賊節年為害虜去人口在寨不止數百勒銀取贖因而賣與各土官輕價收買羈留各寨候調征之時割取首級轉作功次蓋從來用兵惟計首功其被虜人口送官者量行給賞不如

首功之厚故各土官利在要功覓賞使被虜殘命於刳掠焚蕩之餘復遭屠戮與苗蠻枯骨同一醃焙梟挂慘毒之恨感傷和氣誠聖治之所不忍也臣節行曉諭禁約及將奪回被虜人口分別男婦老幼等第立為賞格比首級略加優厚其土官亦許有能送出口全活數多者具奏陞賞欲使知其所利重於首級則不必於斬取以邀功誠使殘民垂死之命得以生全男女長幼相折補每口用銀大約三兩則銀一千兩可活三百餘口

所費者少所活者多但軍功論首級其來已久一旦欲以所全人口計功論賞恐各土官驟聞未敢以為必行之令或疑不信如蒙乞勅兵部再議明立賞格示之大信將舊例土官部下獲功一百顆該散官一級二百顆陞二級三百顆陞三級其不及前數而能送出被虜人口數多男子十六歲以上至六十歲一口准一功老弱婦女二口准一功容臣覈實具奏與首級一體通算量加陞賞如此則各土官知聖明有此殊典無不樂從臣恐

不但目下彼虜人口蒙生全之福累年為賊所執拘留
在巢虐使者亦將送出以為功所全活將不可勝計除
患恤民莫此為切緣係云

大征苗賊功次疏

題為擒斬苗賊功次事案照先該臣將三省應剿稔惡
叛苗分布哨道劄委各哨監統等官剋定嘉靖二十九年
九月初三日丑時進兵至本年十一月二十八日止總
計三哨擒斬俘奪共六百一十六名顯口內生擒一百

零四名斬首二百四十顆俘獲賊屬一百八十七名口
奪回被虜男婦八十五名口在數奏內有名首惡并各
寨苗首龍董龍俸龍柳補龍老課等三十三名顯就於
本月二十九日具題外臣隨看得各寨首從苗賊勢雖
奔潰其竄伏林菁尚多及有聚險拒劄臣遵照欽奉勅
旨切責嚴督各該撫鎮等官深入重地臣與貴州巡撫
都御史任轍總兵官沈希儀駐劄銅仁府湖廣巡撫都
御史屠大山總兵官豐城侯李熙駐劄辰州府四川

巡撫都御史張素駐劄重慶府協心催督各哨官兵奮
勇剿捕其貴州巡按御史董威湖廣巡按御史谷嶠四
川巡按御史鄔懋卿俱至附近地方紀驗功次至本年
十二月不等日據貴州哨監督副使趙之屏報准統督
叅將石邦憲手本報稱云又據湖廣哨監督石叅議
張景賢報准統督都指揮李英手本報稱云又據
四川哨監督僉事薛騰蛟報准統督副總兵李爵都
指揮孫賢呈報云等因各到臣據此除去年十一月

二十九日具題外至今一月有餘總計三哨又擒斬俘奪共九百七十名顆口内生擒九十四名斬首二百零八顆俘獲賊屬三百九十名口奪回被虜男婦二百七十八名口在數奏內有名首惡龍七保龍老二吳浪七龍柳普龍老天龍老課吳老跳吳得者龍老犴龍跳馬吳老條龍瓦業吳老垣龍老胖龍得柳共一十五名各寨賊首吳老母吳老貫龍朗七田老課田老革共五名尚有龍許保吳黑苗未獲其母妻妾弟男一夥俱已受擒

龍許保該哨官兵俱稱十一月二十八日宣慰安萬銓部目底蘇擒獲至今未曾報解未知有何情弊已經督查未報近准兵部咨為乞恩紀錄功次以勵將士事先該臣題本部覆題看得四川哨湖廣都司都指揮僉事孫賢貴州哨戴罪管事協守貴州地方右叅將石邦憲各領兵於苗賊出沒四路把截各陸續擒斬共一百三十六名顆俘獲奪回被虜男婦一百三十四名口皆係大舉之前功次合候命下之日備咨都察院轉行川貴

巡按御史將孫賢石邦憲先次得獲功級行令分巡官
查驗收入今次大舉功內題奉欽依備咨前來准此臣
自委官防截至大舉至今通計擒斬俘奪共一千八百
五十六名顆口內擒斬七百八十二名顆俘獲賊屬男
婦五百九十一名口奪回被虜男婦四百八十三名口
為照先據布政司通報銅平舊在冊首從苗賊共計一
千二百有零前項擒斬已七百八十二名顆係臨陣斬獲
及在山揆扒真正苗賊其巢寨屋窖米穀財物俱為我

兵燒掘盡絕又十一月初四初五十二月十九二十四
日連旬凍雪深厚尺許各哨俘獲解到賊屬驗多肢體
瘰裂殊非人形審據吐稱逃匿林菁之苗凍餓身死在
內者不少縱有存者不過掘食草根度命其得穿山
走脫逃入各土官衙門數亦不多追究可得此皆仰仗
皇上弔民伐罪之威上天輔佑之應也目下春入漸深
東作將興土兵思歸務農臣一面督令該撫及守備官
招撫殘黨許以不死聽其投順隨宜安插量留精銳旗

軍打手及附近土兵人等防守并挨捕不服招撫餘黨外其貴州宣慰普安等司州兵悉放歸農以省軍餉再照湖廣蜡爾山下數寨不服招撫合夥貴苗為惡臣具題勦其太甚及進兵之初復行撫諭冀其改過各苗稔惡不悛窩藏貴苗有名賊首麻得盤吳旦逞等仍又助兇不時前來暗衝營寨若不誅除必為後患臣已責成該地方永保二司宣慰彭明輔彭蓋臣酉陽司宣撫冉玄會兵攻勦取其魁渠撫其餘衆務使伐當其罪

而知警撫服其心而知恩地方削平酌定善後事宜另行一併具本奏報緣係云

云

苗賊突劫思州疏

題為漏刃惡賊糾集殘苗突入府城虜害官民事臣於嘉靖三十年二月二十九日據湖廣平溪衛申報本月二十六日巳時據被虜走脫思州府民人黃相報稱有苗一夥忽於二十五日巳時進入思州府城捉虜府官焚燒房屋殺虜人畜財物等情飛報到臣一面督令各

該哨堡官兵粘踪截殺隨行貴州分守思仁撫苗右叅
議劉望之備查前賊的係何處村寨始從何來繼從何
往虜去思州府官吏民人等并被害若干刮去倉庫錢
米若干印信有無存亡及令弔取該府知府李允簡逐
一查勘去後三月初七日據該道呈覆遵依親詣思州
府查看得城內居民不上十六七家知府李允簡等具
稱二月二十五日巳時正在外升堂晝卯各苗陡然忽
到城外稱係瞿塘等衛前來替班防守軍兵比有瞿塘

衛防守百戶陳堂絕無一名出哨探報該府故不得知
况係白晝失於防閑以致一時閉門捍敵不及被苗衝
入其為首者果係龍許保吳黑苗及湖寨不知名一瘦
老漢另有小頭目八人亦不知寨分姓名其持槍帶刀
向前好漢實數不上八十餘人名賊向李知府嚇說如
今定要將你進寨替我主張招我安生便罷又與李知
府說你傳與石叅將只莫要發兵截我便饒你命等語
二十五日劫府城後因庫藏空虛民戶寡少無所大獲

各相埋怨住劄一日商量欲分作三路一路由馬口司
一路由鬼洒溪小羊山一路由茅坡等處肆行剗掠地
方隨有探事苗人來報說撫接爺都在鎮遠見今調委
楊通判何守備帶領土軍馬前來策應方纔懼怕於
二十七日早止分兩哨行止半途復有探事苗人來報
有石叅將已發多兵各處截路各苗驚慌復又會聚苗
羅板寨作一夥由茅坡省溪等處前去不知經由何路
歸巢因此李知府王知事盧經歷并府吏張自丙蔣輝

陳天相并民人脫身回還者頗多三月初一日午後據
清浪衛差軍餘呂秀回稱各苗中途聞有石叅將發兵
截路不敢徑回尚在藏躲不知何處山菁等情備查到
臣本日隨據原任叅將石邦憲稟據原差伏路銅仁疔
兵張思文等於思州茅坡裝塘擒獲打劫思州回還湖
廣呵保寨惡苗龍老四千戶李珊土官楊通達土舍楊
再任於三渡河截殺箭傷惡苗七人奪獲四川小平茶
苗婦一口奪回被虜婦六口省祭吳經元客商二名衝

散人口無數苗見追急將牛六隻砍死塞路奔進茶溪
山去訖續又據叅將石邦憲稟據原分桃映裝塘領兵
千戶安大朝率領四十八旗屯鄉兵截殺奪回被虜男
婦七名口驢一頭牛二隻指揮奚都領銅仁司鄉兵楊
科等於地名木寨生擒苗賊一名龍老喬斬獲首級二
顆龍老青龍平留奪回被虜男婦一十九名口指揮王
世臣千戶楊鳳鳴領凱兵李元秀等乘虛直搗唐寨擒
獲婦六口不肯前來盡皆殺死只背首惡龍得者親女

一名約年十二歲奪獲馬二匹衣物等件十餘背指揮
周鼎領鄉兵張思文盧思剛等於龍塘伏路奪獲被虜
男子三人牛三隻武舉千戶陶增家丁陶興陶才奪獲
被虜男婦二名口又據叅將石邦憲稟本月初二日思州
都坪司被虜土官何世麒脫出回至銅仁府合行稟報
等因到臣據此案照臣欽奉勅諭征剿貴州銅仁苗賊
先後通計擒斬俘奪一千八百五十六名顆口除奪回
被虜人口外實擒斬七百八十二名顆俘獲賊屬男婦

五百九十一名口尚遺首惡龍許保吳黑苗未獲其母妻妾弟男一夥俱已受擒獲該哨官兵節稱十一月二十八日宣慰安萬銓部目底蘇擒獲龍許保未解節經督查及審據賊屬被虜人等俱稱殘苗穿山走脫四散逃躲各處者數亦不多且春深東作將興土兵思歸務農臣一面督令該府及守備等官招撫許加存恤隨宜安插量留精銳旗軍打手及附近土兵人等防守并俟捕不服招撫餘黨其貴州宣慰普安等司州兵悉放歸農

已經具題即行招撫隨據貴州宣慰安萬銓親到臣軍
門查審執稱龍許保吳黑苗母與妻妾弟男一顆悉已擒
獲二苗不知逃匿去向委實未得今據前因為照銅平
苗賊擒斬數多脫逃各處之苗探得官兵掣散陸續潛
回雖行撫恤尚多未知但村寨窖藏米穀財物盡為我
兵燒掘妻子俱各就俘無食依倚易於鼓動遂被龍許
保等四下糾集湖川殘苗拌死出劫財物且求旦夕之
活其銅仁朗溪提省思南等處提備嚴謹不敢奔突查

得思州府隔離苗寨七日之程地方寫僻城內居民不滿二十家少兵把守及查得猾苗不由銅仁提省正路陸續透從小路穿山伏林至清浪地名邊浪孫家莊集聚裝作調來換班防守軍兵突入府城虜劫倉庫錢糧殺虜人民財物無數雖該府知府李允簡署印知事王月謙經歷盧蕙中途脫回該府并經歷司儒學印信俱各見存但生民被其虜戮庫藏被其劫掠貽害地方甚為慘酷所據各該地方守土官員俱合有罪叅照貴

州巡撫都御史任轍總兵官沈希儀親臨賊巢執馘數
俘徒知蔓草之已除不虞死灰之能燃銅仁切近之處
布置頗嚴思州偏窩地方周防欠謹卒然變起莫能支
吾協同鎮守貴州提督清浪叅將劉鳳駐劄清浪相去
思州僅三十餘里賊至不知策應賊退不能追截屢稱
患病情願告休怯懦無為未展一策戴罪原任叅將石
邦憲先委統兵立功殺賊見留銅仁防守所劫地方原
非其責殘苗復聚亦欠關防及發兵截苗歸路頗有擒

斬微勞功過亦足相揜分守思仁撫苗右叅議劉望之
職任撫苗招徠殘黨適在撤兵之初方議撫處之宜思
信未俘於一時事變橫生於所忽思石兵備道僉事喻
冲駐劄思南專防播賊之難懸隔銅仁弗與征剿之謀
非力所及原情可恕思州府知府李允簡委在銅仁隨
軍紀功畢事回任方及五日倉皇被執先事之防已踈
艱難多端全印之術亦幸以上各官職任雖有大小均
有失事之罪及臣奉勅征剿進兵五月略不能以及遠

慮不足以識微誅之不能盡其類撫之未能服其心魁
渠漏網殘黨竄伏敢潛入於僻郡致禍延於生靈臣之
罪獨多於諸臣者也如蒙乞勅該部議擬將臣首加罰
治其餘諸臣分別輕重亦量加罰念地方急在用人使
各戴罪跟究前項賊徒惟龍許保吳黑苗罪惡深重
必正典刑其餘殘黨或有未聞招撫之令外為二酋誣
誤內為饑餓所逼相隨打劫一面撫處其有怙亂不悛
仍伏山林不服招撫者查照臣原題奏事理將臣所留

防守精銳旗軍打手及附近土兵人等相機剿捕務在必得使餘黨帖服地方獲安為此具本專差千戶仇爵親齎謹題請旨

截獲苗賊疏

題為漏網殘惡復糾出劫官兵截殺獲功事臣於嘉靖三十年四月二十二日據貴州布政司分守新鎮思仁兼管撫苗道右叅議劉望之呈報銅仁府申奉本道督發各把截官兵臨陣生擒叛苗田老雷龍老比等五名

到府當該知府鄒廷澤督同委官各府衛經歷徐稻方
希顏審據供稱嘉靖三十年三月內有湖廣蜡爾山等
寨苗頭龍老遠等十餘人各騎坐馬匹前到貴州各寨
相約唐寨龍得者普杓寨龍老革地迤寨龍葛鮓田坪
等寨不知名苗頭等要行出劫比龍得者等依允砍牛
斷話各回收拾至本年四月初三日來到地架寨苗龍
老央寨取齊通共男婦七百餘人始於初四日起程比
有蜡爾山苗頭龍老遠龍老哦地架寨苗頭龍普娘略

變寨苗頭龍淵抱水寨苗頭龍老革地通寨龍阿貫地
架寨龍央老各騎馬匹俱向前打路於初五日早到平頭
上因虜得牛馬祭旗商同要去攻剗石阡印江所管板
橋昔陀浹口等處探知各處關隘嚴謹兵多懼怕不敢
前進止將公義洋溪駱映屯一帶地方搜搶得牛馬家
財人口不計的數齊轉回頭於十二日過省溪地方被
伏路官兵對敵我們不過次日行至貓兒囤不料又有
官兵數多裝伏各塘齊起截殺當將我們前鋒騎馬

頭腦人殺了兩三箇倒下馬因此懼怕各不相顧將虜
來牛馬人口并自帶來的器械盡數丟棄奔敗間被衆
兵追殺斬首數多及將我苗五箇并連首級苗婦同人
口牛馬陸續解府本道發府審取前情是的除將各犯
并苗婦苗仔俱監候又督同委官經歷徐稻方希顏親
將首級逐顆紀驗及帶熟苗麻順并鄉健人等眼同辨
認俱係真正臨陣擒斬惡苗誠為奇績似應從厚犒賞
以勵來效今將審過口詞并驗過功次呈報到道親自

覆審實獲生擒苗賊五名賊級六十六顆見獲人口二百名口明白造冊具由呈報到臣案照臣奉勅征剿銅平苗賊先後擒斬俘奪共一千八百五十六名顆口除奪回被虜人口外實擒斬七百八十二名顆俘獲賊屬五百九十一名口俱經具題訖尚有三哨續報擒斬俘奪另共有八十五名顆口在案未及具題臣看各賊擒斬頗多春深兵丁難以久屯即行招撫隨議同該省巡撫都御史任轍審度要害於石子坡黃蜡灘壩地崗木桶

龍于四十八旗等一十二處設立哨堡量留精銳軍兵
防守及相機揆捕不服豈料首惡龍許保吳黑苗等原
未擒獲乘隙潛回糾拽透從山路突至思州僻郡刦害
官民財物甚為失事罪不可逭臣復看得苗賊既刦思
州必為得計且自分必誅招撫雖加必不見信况饑困
無食勢必旋踵復出臣即移緩就急先抽撥湖廣乾州
五寨二哨防兵共八百名晃州哨防兵二百名前赴銅
仁聽原任叅將石邦憲會同撫苗叅議劉望之調度分

布鷗擒首惡龍許保吳黑苗及防截怙終出劫殘賊去
後今據前因為照苗數本不甚多然敢于出劫地方者
由首惡龍許保吳黑苗未除糾合湖川二省殘苗乘官
軍掣退出劫虜食負重遠來我軍伏路截殺以逸待勞
獲功數多中間另驗有苗婦裝作為苗人不准作功者
三十餘口黨類無多亦從可知臣除將獲功官兵自指
揮以下覈實功次分別犒賞外照得原任叅將石邦憲
分守撫苗右叅議劉望之調度有方官兵効力截殺多

功似當甄錄緣思州失事見為叅論但石邦憲留委銅仁
防守思州地方原非其責劉望之適在掣兵方議撫
處機宜未定變出不意先過後功亦足相掩伏望皇上
憫事變之不測勢力之難全乞勅該部將二臣以功贖
罪免其罰治量為甄錄責其後效何勝感戴臣又查
得首惡龍許保吳黑苗今次內防官軍搥巢不曾出劫
但各苗實由主使魁首不除終為作梗地方難以平靖臣
多方計處相機勦務期必獲以絕禍根其餘殘黨并

脇從者除已撫處外其未聽撫者再行撫苗等官開示
恩信聽其投撫照舊安插務使畏威懷惠苗人帖服地
方永賴而後已緣係云

擒獲首惡龍許傑疏

題為擒獲勅內坐名首惡叛苗事嘉靖三十年五月初
七日據貴州布政司分守新鎮思仁兼管撫苗石叅議
劉望之防守銅仁原任叅將石邦憲委守備指揮張大
儒押解極惡賊龍許保等到臣復據各官呈稱訪得

湖貴川省叛苗惟龍塘寨龍許保為首奸深計大膂力
過人勢壓眾苗易於嘯聚此惡不剪餘患難除况又聞
約三省苗頭吳黑苗龍老遠龍得者等欲再出劫只得
重示懸賞祕遣鄉健李宗一楊春秀吳永富入粟四魯
母等寨責令順苗麻得盤吳老獬逞旦逞等計擒查得
龍許保因四月十三等日眾苗出劫至猫兒囤地方被
官兵截殺大敗回巢方知懼怕不敢即出至二十日帶
同伊族惡黨苗人龍重陽龍郭大來到伊親田坪寨苗

頭吳柳苟家弔喪是麻得盤因就賺請過魯母寨吳旦
送家求伊女與許保為妻比吳旦送佯為許允設酒款
待以致龍許保等歡喜痛飲深醉麻得盤吳老革吳旦
送父子兄弟等方敢下手將龍許保并龍重陽一時綁
獲欲行解報間被龍郭大脫走與吳柳苟前去糾集龍
塘鬼捉都庫罵勞等寨殘苗前來欲行搶奪麻得盤吳
老禪等星夜來報本道并石叅將處發兵前去接護
有石叅將身自督領指揮周鼎陳繼爵劉良貴等押帶

漢土精兵二千五百名直抵伊寨護取彼田坪龍塘等寨惡苗懼怕各遁去訖隨有各寨苗人聞知陸續前來俱稱許保乃係苗王若要將伊解官我們衆苗亦願大家送出如何只吳旦遲麻得盤吳老猱等得了賞銀今我苗巢寨人口殺燬殆盡窮迫難存今乞要重重犒賞永不背叛石叅將星夜稟報軍門蒙批已行劉叅議若得獲首惡地方獲安小費不必計較石叅將遵依在彼隨宜給賞除原懸賞外復加賞計謀下手擒拏許保及

各寨情願聽招苗人訖將龍許保并龍重陽押解前來
等因呈報到臣據此案照先該臣節奉勅諭督率官兵
剋期三省進攻自入山并猫兒囤等處先後截殺功次
陸續俱經具題訖惟有首惡龍許保狡詐百端潛遁未
獲臣看得此賊極惡終為後患官兵進剿已焚其巢寨
收其積聚獲其妻子當此奔敗之餘東潛西伏雖有多
兵亦無所用惟踪跡所在用計擒捕仍以精兵鷓其餘
黨則可以費省而事集會同巡撫都御史任轍計處方

略分立營堡把截要害專以擒捕鷓鴣之事責之叅將石邦憲與撫苗叅議劉望之凡事計議而行仍行鎮守貴州總兵官沈希儀提調催督各賊前懾大征之威近懲猫兒囤之敗其中聽撫諸苗如麻得盤麻順吳旦逞吳老獐自出見官口稱數年地方之禍皆龍許保一人倡首致我衆苗不得安生若許保不死我苗決為帶累身家難保等語因擔認擒獻許保以免後患乞發兵策應恐有搶奪節據叅議劉望之叅將石邦憲會報又經

督行湖廣湖北道守巡官叅政陶欽夔副使劉天授陸
續發打手土兵二千名前去策應今據前因臣除將本
犯審發湖北守巡兵備各官覆審監候外叅照極惡苗
賊龍許保稔惡多年貽害三省銅仁之郊野已為丘墟
湖川之疆界時被侵擾殺戮則嬰孩不遺抄括而鷄豚
為空至於攻打省溪印江石阡思州等衙門虜官奪印
掠燒倉庫虜質人口肆其兇殘略無忌憚惡貫滿盈神
人憤怒已不容於同類豈能逃乎法網從來苗頑黨惡

相濟未有肯自執首惡以求款附者此皆伏遇我皇上
神武布昭至誠感神故能使魁渠俘馘醜類革心以背
公死黨之夷一旦變為嚮風慕義之舉禍根已除衆心
解散苗勢衰弱餘黨竄伏臣等憑藉威靈若處置得宜
則地方兵禍可冀銷寢臣又查得先年總督軍務右都
御史王來擒獲苗王賊首韋同烈曾經押解赴京典刑
合無查照前例將龍許保檻解赴京伏法市曹以雪衆
憤或念道里遙遠動經旬月誠恐中途瘐死不無遺刑

惟復就近遵照軍法會官徑自處決緣係擒獲勅內
坐名首惡叛苗事理未敢擅便為此具本專差承差
楊勝春親齎謹題請旨

謝恩疏

奏為謝恩事嘉靖三十年五月二十七日准兵部咨職
方清吏司案呈該本部等衙門會題兵科抄出巡按貴
州監察御史董威題為漏殄叛苗復肆猖獗攻打府治
叅論地方失事緣由覆題奉聖旨朝廷設置總督欲其

事權歸一以盡除苗患張岳原奏分哨進兵又稱湖苗聽撫今乃攻陷府治虜殺守臣失事重大即當拏問處治念係緊急用人姑且與做兵部右侍郎兼右僉都御史職名戴罪任事仍前住俸欽此欽遵臣即於本日望闕謝恩到任照舊管事外伏念臣本以章句諸生粗諳文墨軍旅之任非其所長屬以銅平苗情急在用人皇上兼收羣材不遺樗櫟俾臣總督三省融處兵糧相機撫剿臣於去年九月內分發哨道責任將帥頗有俘獲勢

將寧息不意首惡遁逃殘黨饑逼陰聽土官之謀公行思州之劫意在困臣且釀後禍揆厥所由皆由臣節制欠嚴謀略踈闊之所致也伏蒙聖恩矜其愚昧曲賜生成以斧鉞必加之罪納之天地包容之中僅鐫官階尚畀事任部伍不移節制仍在罪重罰輕感激涕出雖希斷之指已傷而一割之志未已臣敢不整飭戎行宣示恩信兵有所不加而誅止及於逆命備不敢忘設而慮尤創於幾先不但靖寇兼冀息民庶收桑榆之功以答乾

坤之造臣無任受恩感激之至為此具本專差百戶金子麟親齎稱謝謹具奏聞

叅究主苗酉陽宣撫冉玄疏

題為姦惡土官陰黨殘苗屢攻衙門乞行處治以正國法以杜後患事嘉靖三十年五月初七日據貴州布政司分守新鎮思仁兼管撫苗右叅議劉望之防守銅仁原任叅將石邦憲委守備指揮張大儒押解極惡賊首龍許保前來臣當堂對衆面審吐稱今年虜刼思州我

貴州殘苗不多俱是酉陽管下地崩岑地龍箐小平茶沙留等苗伊司頭目張魁主使前去攻打又將黑騾一匹賣與許保騎坐與銀一十五兩等情據此該臣先據都坪長官司被虜走脫土官何世麟前赴軍門投見親審本官執稱親在賊夥多有酉陽土人目兵在內同劫思州各人身穿斑絲斜紋綾紬衣服手執花槍花牌鈎刀俱是該司號色軍器比與衆苗衣服器械不同等情又據平溪衛指揮袁宗文稟稱思州府被虜脫回伊親

監生周廷璉與伊手帖說稱清浪軍人董伏二重復被虜至龍罩坐講前項刦思州賊內有酉陽頭目張魁并地名地崩岑等苗等因備抄原書前來又據貴州分守撫苗右叅議劉望之呈解被虜放回人民苟仁到院供稱被地迤寨苗人龍十觀等鎖虜到寨見一苗身穿斜紋白綾短衣紅紬長裙前到地迤比仁密問寨內被虜日久婦女稱係酉陽差來查被虜人口等語又據永順宣慰司申酉陽冉玄因見苗平兵退地方無事恐怕上

司根究攻打平茶殺虜官印罪大商同舍目覃鳳等計約各苗龍許保吳黑苗等攻打思州將婦女四口皮箱一箇馬二匹送與冉玄段足衣服分衆把總等情案照酉陽宣撫冉玄先於嘉靖二十八年七月內為因湖廣鎮溪所慣惡土指揮田應朝姦計跋扈苗兵衆多以女招配資其聲勢無故擅將平茶洞長官司土人盡行殺虜抄奪土司印信虜辱土官妻女已經具題查究間仍敢謀吞平茶地方將虜去已故土舍楊正嵩庶子楊通

一立為土官拘在伊司仍以楊通一出名挽報兵數又
擅將奪去印信用鈐冊領冒支平茶土兵預放進哨糧
銀八百九十二兩五錢臣看得平茶既破印信人口俱
稱酉陽虜去要見各官有何憑據交與何人顯是酉陽
盜冒嚴行分守該道右叅議孟淮追出前項糧銀如數
還官見貯黔江縣庫附照行布政司及該道查勘應襲
土舍嘉靖二十八年十二月二十九年正月間冉玄因
臣叅究其謀吞平茶之罪與田應朝商令伊家人田喜

安等買拽前項叛苗先後攻打印江石阡府縣使地方失事臣必得罪換官前來總督方可圖滅前案彼時雖聞人言尚無實証及被虜走回千戶安大朝贖出知縣徐文伯各執稱被虜之時有苗賊龍得者等向職說是田土官用銀一千兩買我衆苗來打你地方如今有箇田土舍見在此安大朝徐文伯親見土舍身穿綠緞短襖頭帶圓帽年約五十餘歲等情臣思得丹玄為糾苗之腹心而田應朝乃丹玄之手足先得應朝或可以伐

謀寢禍臣即著落永順宣慰彭明輔計獲田應朝及
田喜安等一併解官審發吊取千戶安大朝知縣徐文伯
審執苗賊攻打印江時各官識認得田喜安面目的確
田喜安亦認得徐文伯安大朝俱經招承服罪監故訖
隨責令丹玄將平茶人口印信吐退豈料將欽降原印
仍占留偽造假印交還平茶臣逐查平查日行申報卷
內驗出先後印文差異就督行守巡該道辨驗一併查
究去後復查得蜡爾山下地崩岑沙留地龍箐小茶平

先年係屬鎮竄苗寨後因田應朝與冉玄締為姻好同惡相濟故將前寨割送冉玄管轄冉玄得此數寨愈加膽大節年陰令張魁等勾引惡苗復劫郡縣以成中傷之計一則使臣徬徨待罪極力周防無暇追理其咎一則料臣罪黜以去新官接管一時不知詳細得以延捱出脫且思州被劫道路誼傳係酉陽主使該貴州巡撫都御史任轍駐劄鎮遠先有所聞已經題稱酉陽宣撫司所轄苗寨尚多遁逃今次出劫傳聞亦相糾聚乞勅臣

責併該司獻其首惡等因叅照酉陽宣撫丹玄封豕之
性肆毒無厭欲大封疆不憚屠戮之慘久通苗醜甘為
窩引之原信頭目覃鳳張魁為爪牙侵占貴州沿河祐
溪司土地以昇覃鳳又占湖廣地崩岑貴州九江等處
地方以居張魁諸司力不能敵束手受奪又偽造平茶
邑梅平頭等司印信捏申文書以行構害其攻平茶將
已故土官楊再顯剥皮抽腸又將該司丁壯殺戮千餘
嬰兒五百餘口縱火燒死慘不可言湖廣川雲土官未

有若是之縱肆者該地方守巡兵備等官明知其惡法令不行只得姑息曲為隱蔽以故愈肆猖狂罪案累年不決臣思止沸去薪除惡務本丹玄神姦鬼譎既能號召苗蠻虎噬鷓張又敢唆苗攻打城郭見臣欲究其罪則設計相傾為謀滋長况其變詐縱橫足以鼓動上下其金銀土貨足以結交彌縫其文移便給足以駭惑聽聞若復諉為土官姑息不治紀綱廢弛法度不行邊患苗情終無定期如蒙皇上明見萬里深究亂階乞勅該

部再加詳察將丹玄先今所犯事情行臣勘究先將主使撥置頭目覃鳳張魁責該守巡兵備等官勒限拘拏到官審究窩苗通苗及夥劫思州緣由解臣覆審然後行提丹玄果有干碍一併治罪以示土官臣又訪得湖川土官專一收留各處光棍無賴成羣潛住京城打聽事情或交通賄賂或央求面分或騰駕謗言挾害上官或規傳是非誑惑愚民乞勅該部行緝事衙門但各土司有光棍人等潛住京城如前所為者盡行禁逐其所

賈帶金銀私帖等項追究入官應治罪者治罪庶奸人
知警言戒而紀綱自正緣係云

報過撫剿殘苗疏

題為遵奉明旨剿撫殘苗事嘉靖三十一年四月十五
日臣據貴州布政司分守思仁道兼管撫苗右叅議劉
望之貴州按察司整飭都清兵備原監督副使趙之屏
分守貴州銅仁等處地方右叅將石邦憲會呈奉臣批
據各職呈照得銅平所屬各寨叛苗先自大舉各寨征

止三分之二猶恐不的比因各苗赴撫苗道支給賑濟口糧行府查報名數相同見今各苗市買牛具種子魚鹽俱聽坐寨鄉健帶至銅仁府與市民兩平交易龍塘粟凹等寨講理私讐亦俱赴道訴理聽與處分村居遂漸稠密道路行旅往來早暮隨便自去歲八月迄今地方無警居民安業等因奉批各苗雖聽撫尚有吳黑苗惡名亞於龍許保已經題奏在於必得近日藏在何處曾設何策用何人購捕何時大約可得此賊

不除終為地方之患不可徂於習俗之見為含糊姑息
之計仰再會查詳報繳依奉查得新寨原苗四十九名
除大征鵬剿之後止存吳黑苗并小苗二名祇因龍許
保既擒之後伊即驚遁未出雖據屢次具狀令小苗投
訴乞生各職亦未敢聽信中止一向協力設計且將伊
族長吳黨所親男吳永順拘留執當著落跟要無柰本
賊傷弓之鳥遁跡愈堅菁大山深東藏西躲欲為圍困
之計只因班師既久難請動調大兵欲為鵬剿之計又

因撫處已定難併驚擾各寨似此暫無所施只得另行
計擒免到剿撫兩悞况思原奉明旨曾有脅從餘黨隨
宜招撫之條今苗已定地方已安惟此一賊料是離羣
穿虎終難脫網若不先行呈報祇恐有負明旨合無准
容先將已撫殘苗省令安生免復驚懼仍將吳黑苗催
行石叅將秘計擒獻不致踈虞庶幾苗人得分順逆居
民得保治安實為地方之便等因并據湖廣布政司分
守湖北道兼管撫苗右叅政陶欽夔湖廣按察司整飭

辰沅兵備副使高節分巡湖北道僉事曾才漢分守鎮
筧等處地方右叅將孫賢會呈查得鎮溪千戶所并筧
子坪長官司各所轄苗寨共三十四處除崖洞板栗茅
岡泠水溪等處原係叛苗寨分已該官兵攻打將苗龍
亞者等俱已生擒及將各巢寨燒燬無存其餘原經招
撫并征後無過共二十八寨內鎮溪千戶所管下一十
二處聽撫苗人龍老黨等二百一十名筧子坪長官司
管下一十六處聽撫苗人吳老朶等五百三十八名自

嘉靖三十年正月內班師之後鎮溪各苗俱赴永順宣慰彭明輔處算子坪各苗俱赴保靖宣慰彭蓋臣處各領榜給賞魚鹽回寨安插耕種各宣慰責差頭目帶領家小併健目人等坐寨各苗有欲收買魚鹽生畜聽健目帶領各苗前到乾州市兩平交易並不敢生事為非重復查明造冊開報等因各呈到臣卷查先該臣遵照節經欽奉勅旨切責嚴行各該撫鎮等官上緊協心征剿事理欽遵將三省應剿稔惡叛苗分布哨道畫圖貼說通行劄委各

哨監統等官剋定於嘉靖二十九年九月初三日一齊
舉兵進剿續據貴州哨監督按察司副使趙之屏湖廣
哨監督布政司右叅議張景賢四川哨監督按察司僉
事今丁憂薛騰蛟各呈准統督銅仁右叅將石邦憲湖
廣都行二司都指揮今陞清浪右叅將李英鎮草右叅
將孫賢原任松藩副總兵李爵等手本開據各哨坐營
領哨領隊守備等官張鉉王夢麒徐椿齡等報稱自進
兵日起至嘉靖三十年正月十四日止貴州哨官兵攻

破原分進剿本省銅平所轄龍塘等寨陸續生擒首從
苗賊龍老餘龍小保等八十一名斬獲首從苗賊龍董
龍老保等并知名首級共一百四十九夥俘獲賊屬
一百六十五名口奪回被虜男婦一百二十四名口湖
廣哨官兵攻破原分進剿貴州銅仁司所轄麻銅等七
寨生擒首從苗賊吳政等斬獲首從苗賊吳老課吳昔
奴等并知名首級及攻剿本省不聽撫鎮筰所轄崖
洞板粟回保昔朗冷水紅崖下水板凳著安等寨生擒

首賊龍求南龍亞者龍老子龍老官吳老莽龍各者吳
老那斬獲首賊龍補那龍七柯吳保恰吳晚兒等首級
并攻摻貴州原剿新寨等八寨生擒首從苗賊龍老草
龍柳普吳老跳等斬獲首從苗賊吳老坦吳老馬等并
不知名首級共計陸續生擒四十六名斬獲首級一百
一十三顆外俘獲賊屬二百一十名口奪回被虜男婦
一百四十八名口四川哨官兵攻原分進剿貴州平頭
司所轄塘寨等八寨生擒首從苗賊龍史洛等斬獲首

從苗賊龍柳補龍老七等并知名首級及攻剿本省
不聽撫酉陽管轄鬼益等寨生擒首從苗賊龍老啞等
斬獲首從苗賊麻老忙等并知名首級并攻摽貴州
原剿龍塘罵勞等寨生擒首從苗賊龍老王等斬獲首
從苗賊石老懶等并知名首級共計陸續生擒七十
一名斬獲首級一百八十六顆俘獲賊屬二百零二名
口奪回被虜男婦九十一名口各開報到臣及查貴州
四川二哨統督叅將石邦憲都指揮孫賢未進兵之先

領兵四路把截陸續擒斬俘奪共二百七十名顆口已
經題奉欽依收入大舉功內總計先後通共擒斬俘奪
一千八百五十六名顆口及查各賊巢寨屋窖米穀財
物俱為我兵燒掘盡絕及審俘獲賊屬吐稱雖有逃匿
山菁之苗多凍餓身死雖有存者不過掘食草根度命
其得穿山走脫逃入各土官衙門數亦不多臣看得春
入漸深東作將興土兵思歸務農除行諭殘苗許以不
死聽其投順隨宜安插量留精銳軍兵防守并疾捕不

等日苗賊出劫平頭貓兒困等處又該官兵擒斬俘獲二百七十一名顆口呈報到臣及查得本年正月十四日以後各監統等官續報三哨通共續報擒斬俘奪八十五名顆口在案一併具本於本年四月二十八日具題訖本年五月初七日據貴州守叅等官劉望之等呈稱懸賞設計擒獲極惡賊首龍許保連人呈解到臣審發湖廣湖北守巡兵備道審供監候即於本月初十日具本奉行兵部覆題奉聖旨張岳等既擒獲首惡著待

事寧之日巡按查明功罪一併奏請仍著嚴督各官務
在剗絕餘黨以靖地方龍許保著彼處會官依律處決
梟示欽此咨臣欽遵會行貴州撫鎮等官遵照欽依內
事理於本年八月初七日將首惡龍許保押赴市曹依
律典刑梟示及具本題知外又該臣看得未獲吳黑苗
亦係屢奏有名與龍許保同為惡務期必獲庶不怙終
作梗又經嚴督各該撫苗守巡兵備叅備等官設法計
擒并鷓剿脅從餘黨隨據分守叅議劉望之呈稱會同

叅將石邦憲嚴督委官指揮王世臣等督兵於龍塘等寨雕剿陸續擒斬俘奪總共三十二名顆解驗明白造冊到臣案候在卷三十一年四月內據貴州叅議劉望之副將趙之屏叅將石邦憲呈稱銅平殘苗剿撫已定緣由前來駁行各官再查及行仰湖廣守巡湖北兵叅等官查勘鎮算各寨聽撫苗人造冊繳報去後今據前因臣會同湖廣鎮守總兵官平蠻將軍東寧伯焦棟巡撫右副都御史屠大山四川巡撫右副都御史戴鰲貴

州鎮守總兵官都督同知沈希儀巡撫右副都御史奉
旨革職冠帶辦事任轍議照銅平鎮草等處叛苗已該
大舉官軍征剿及先後防守截殺鴟剿總計擒斬俘奪
共二千二百四十四名顆口貴州招撫過四百九十八
名湖廣招撫過七百四十八名其奏內有名首惡龍許
保仰賴我皇上威德使其醜類自執以獻已正典刑衆憤
已雪三省地方因以寧謐止有新寨苗首吳黑苗一名
漏刃未獲臣惟此賊因計擒龍許保之後即帶同親信

一二苗人遠遁深山依恃深阻日則援崖峭望雖風吹
草動彼亦猜防每遇鄉導或順苗一二人空身無兵甲
者方得近前相去三四丈相見打話若四五人以上不
問有無兵甲伊即驚疑閃避莫能相近草木翁密嵐
霧翳深東躲西藏又無定在只可計擒難以衆取欲舉
官軍圍困摻捕因大兵撤散已久尤恐驚動方撫之苗
誠有如各官所呈者如蒙乞勅兵部再加查議合無將
臣俸糧照舊住支仍聽臣督併原監督按察司副使趙

之屏該道分守叅議劉望之分守叅將石邦憲設法計擒稍遲歲月暫示以寬緩之意俾其疑慮稍解防備稍寬人得近前一舉就擒以度後患其已撫過餘黨殘苗仍聽臣隨宜招撫省令革心向化永為良民以安地方如此庶上可紓九重南顧之憂下可致三省邊氓之福而臣瘼曠之罪亦或得以少逭矣除計處善後事宜另行具奏其三省監統領哨領隊撫苗等官功罪并賊犯首級先該各紀功官查明造報聽各該巡按御史覈實

徑自造冊奏繳外緣係云

云

斬獲首惡吳黑苗地方事寧完報疏

題為斬獲首惡苗賊地方事寧完報事臣於嘉靖三十一年十月初八日據貴州布按二司原監督整飭都清兵備分巡新鎮道副使趙之屏分守思仁道兼撫苗右叅議劉望之整飭思石兵備分巡思仁道僉事龍遂會同分守貴州銅仁等處地方右叅將石邦憲呈稱斬獲首惡苗賊吳黑苗首級到臣隨准叅將石邦憲手本開

稱自大征之後節奉總督并撫按總兵行委設計擒斬首惡會同撫苗叅議劉望之重行懸賞屢差鄉健督同苗長順苗各用計擒斬及將吳黑苗叔吳黨所親男吳永順羈留府城激其速圖後因久未成功又蒙責成原監督副使趙之屏坐委烏羅朗溪二司土官田興邦楊瑛圖取必須彼此合謀同幹本職節行烏朗二司及差頭目盧思剛督率守催又該分巡思仁兵備僉事龍遂據土官田興邦稟據土舍楊勝原報稱本賊因叅府衙

門鄉尊人等窺捕太嚴以致疑懼尤甚防備愈密不便
動手遂將原差鄉健人等通行禁止不容入寨及將原
羈留吳永順放回以安其心庶事可圖至本年八月二
十四日該烏朗二司守寨人役劉甫等將吳黑苗首級
斬獲隨該撫苗道審據原差鄉健蕭奴祝銀同等并被
虜放回鄉兵羅彬各稱吳黑苗的於八月二十四日該
烏朗二司差人劉甫等入寨計斬首級背行因地所寨
苗追趕爭功丟棄首級被唐寨苗人龍章保尋獲用火

洪乾藏匿在家圖討厚賞續該分巡思仁兵備僉事龍
遂量給犒賞督責土官田興邦於本年九月二十五日
方纔追取首級前來及取土官張文貴等原割兩耳各
道督同思南銅仁二府知府李霖鄒廷澤烏朗二司土
官楊瑛田興邦等辨驗明實取結具由解驗等因據此
卷查先該臣遵照節奉勅旨切責嚴督各該撫鎮等官
協心征剿事理欽遵將三省應剿叛苗舉兵征剿自嘉
靖三十年正月內撤兵并撤兵後猫兒囤等處截殺及

計擒首惡龍許保先後功次俱經陸續俱題訖又該臣
看得苗首吳黑苗漏刃未獲亦係屢奏有名與龍許保
同惡不相上下恐怙終作梗又經嚴行貴州都布按三
司轉行各該撫苗守巡兵備叅備等官設法計擒首惡
并鷓剿脅從餘黨及招撫殘苗嘉靖三十一年四月內
行據貴州原監督副使趙之屏分守思仁撫苗右叅議
劉望之分守銅仁右叅將石邦憲呈稱銅平殘苗剿撫
已定止有新寨吳黑苗因龍許保計擒之後伊即驚遁

已將伊族長吳黨所親男吳永順拘留執當著落名下
跟要無柰本賊傷弓之鳥遁跡愈堅只得另行計擒免
致剿撫兩誤等因并據湖廣布政司分守湖北道兼管
撫苗右叅議陶欽夔湖廣按察司整飭辰沅兵備副使
高節分巡湖北道僉事曾才漢分守鎮筵等處地方右
叅將孫賢呈繳查勘過鎮筵各寨聽撫苗人造冊前來
該臣會同湖廣鎮守總兵官平蠻將軍東寧伯焦棟巡
撫右副都御史屠大山四川巡撫右副都御史戴賢貴

州鎮守總兵官都督同知沈希儀巡撫右副都御史先
革職冠帶辦事今病故任轍議照銅平鎮等處叛苗
已該大舉官兵征剿及先後防守截殺鴟剿總計擒斬
俘奪共二千二百四十四名顆口貴州招撫過四百九
十八名湖廣招撫過七百四十八名其奏內有名首惡
龍許保仰賴我皇上威德使其醜類自執以獻已正典
刑衆憤已雪三省地方因以寧謐止有新寨苗首吳黑
苗一名漏刃未獲仍聽臣督併原監督副使趙之屏該


道分守叅議劉望之叅將石邦憲設法計擒稍遲歲月
暫示以寬緩之意俾其疑慮稍解防備稍寬人得近前
一舉就擒以杜後患其已撫過餘黨殘苗仍聽臣隨宜
招撫省令革心向化永為良民其三省監統領哨領隊
撫苗等官功罪并賊犯首級先該各紀功官查明造報
聽各該巡按御史覈實徑自造冊奏繳等因具本於本
年六月二十五日具奏訖續該臣查訪得吳黑苗往來
湖廣回保等寨依親潛躲節差千戶張克新李美張愛

齋捧旗牌前往銅仁坐鎮催功及行湖廣分守湖北道
撫苗右叅政陶欽夔整飭辰沅兵備副使高節分巡湖
北道僉事曾才漢分守鎮筵右叅將孫賢督併各該土
官并守備防守等官多方爪探毋分彼此一體計擒及
揀委指揮素崇友千戶江添澤等節次領兵前去協同
貴州巡守兵備叅將各官原委守備張大儒知府鄒廷
澤李霖指揮王世臣奚都經歷劉仲芳土官田興邦楊
瑛吏目郝以芳田紹甫土舍楊勝原李承祖等分設計

擒共收全策至本年八月二十六七等日節據貴州守
巡兵備叅將等官趙之屏劉望之龍遂石和憲等報稱
首惡吳黑苗已該烏朗二司差人劉甫等於八月二十
四日在寨斬訖及據烏朗二司土官田興邦楊璞各亦
稟報相同行據各官回稱所斬首級被唐寨苗人奪匿
求賞等因就經駁查追取并嚴諭地所唐寨各苗不許
爭功讐言殺及將殺死土舍土兵楊勝金等優卹去後今
據解到該臣督同湖廣按察司整飭辰沅兵備副使高

節貴州整飭思石兵備分巡思仁道僉事龍遂當堂將
解到首級并原割兩耳逐一紀驗明白除將首級發仰
銅仁叅將石邦憲轉發苗出要路梟挂外為照首惡苗
賊吳黑苗憑山菁之險恃種類之繁倡亂多年流毒三
省攻衙門而虜官奪印劫村寨而放火殺人虐燄滔天
肆無忌憚自夫大舉之初負固梗化班師之後復出跳
梁乃今罪惡貫盈天奪其魄遂使官兵用命一舉斬獲
此皆仰仗我皇上神武昭布之所致况前此犂庭掃穴

醜類久已膽落即今渠魁皆誅殘黨愈覺心畏地方自是而寧三省邊岷庶有安枕之日矣除有功人員聽該省巡按御史查照原行覈查功罪一併查明奏請外為此具本專差承差鄧伯旣親齎謹具題知



小山類稿卷五